

23 APR 2001

RMK8-KERJASAMA

M'SIA AKAN TERUS TINGKATKAN KERJASAMA ANTRABANGSA

KUALA LUMPUR, 23 April (Bernama) -- Di bawah Rancangan Malaysia Kelapan (RMK-8), Malaysia akan terus mempertingkatkan kerjasama pembangunan dengan masyarakat antarabangsa, rakan pembangunan dan negara Selatan lain bagi mengatasi isu pembangunan di peringkat kebangsaan, serantau dan global.

"Bagi tempoh RMK-8, kerjasama antarabangsa akan menumpu kepada pembinaan-kapasiti dan pembangunan sumber manusia terutama dalam bidang Teknologi Maklumat dan Komunikasi.

"Di samping itu, mekanisme bantu diri serantau dan usaha untuk menyusun semula kerangka kewangan antrabangsa akan dilaksanakan bagi memastikan kestabilan sistem kewangan antarabangsa," demikian menurut Laporan RMK-8 yang dikeluarkan oleh Unit Perancang Ekonomi (UPE) di Jabatan Perdana Menteri.

Program RMK-8 yang akan dilaksanakan dari tahun 2001 hingga 2005, dilancarkan Perdana Menteri Datuk Seri Dr Mahathir Mohamad di Parlimen, hari ini.

Di peringkat dua hala, laporan itu menyebut dasar negara melalui pembentukan dan pengukuhan hubungan dua hala dengan negara maju dan membangun akan dipertingkatkan.

Bagi tempoh lima tahun akan datang, Malaysia akan terus membuka lebih banyak perwakilan di luar negara termasuk di Republik Czech dan Ireland.

Mekanisme Suruhanjaya Bersama juga akan diperkukuhkan bagi mempertingkatkan hubungan dua hala, memperluaskan kerjasama di bidang sains dan teknologi di samping meningkatkan perdagangan dan pelaburan.

"Dalam hubungan ini, lebih banyak perjanjian bayaran dua hala, perjanjian jaminan pelaburan, dan tatacara kredit dan pembayaran minyak sawit serta perjanjian kerjasama perdagangan dan pelaburan akan ditandatangani antara Malaysia dengan negara lain," menurut laporan itu.

Di peringkat serantau, negara akan terus berkejasama di peringkat serantau bagi mempercepatkan proses integrasi ekonomi Asean serta menggalakkan perdagangan dan pelaburan.

"Pelan Bertindak Hanoi dan kerjasama dengan anggota Asean akan terus dipergiatkan untuk memperkukuh asas ekonomi dan memastikan pertumbuhan ekonomi yang mapan.

"Di samping itu, cadangan untuk menyusun semula forum Asean campur tiga sebagai Kumpulan Kerjasama Asia Timur akan dikaji," mengikut laporan itu.

Pembangunan rantau kecil melalui pertumbuhan segitiga akan diteruskan untuk mempercepatkan melalui kerjasama sektor swasta bagi memaksimumkan penggunaan sumber asli yang boleh didapati dengan banyak.

Malaysia juga akan terus bekerjasama dengan APEC dan ASEM ke arah matlamat mencapai kestabilan ekonomi dan menggalakkan aliran perdagangan dan pelaburan serta meningkatkan kemasukan kepada pasaran.

Menurut laporan itu, negara akan terus bergiat aktif dalam program anjuran pertumbuhan pelbagai hala seperti Persatuan Bangsa-Bangsa Bersatu (PBB), Komanwel, Pertubuhan Persidangan Islam (OIC) dan Pertubuhan Perdagangan Dunia (WTO).

Sehubungan itu, Malaysia akan bekerjasama dengan negara membangun bagi mencapai pendirian bersama khususnya mengenai keperluan menerima manfaat yang bermakna daripada liberalisasi perdagangan dan untuk menangani ketidakseimbangan kekayaan dan peluang yang diakibatkan oleh globalisasi.

Laporan itu menyebut usaha akan diteruskan untuk menyusun semula kerangka kewangan antarabangsa dan menjadikan proses membuat keputusan

peringkat dunia lebih demokratik.

Bagi memperkukuhkan perpaduan Islam, negara akan bekerjasama dengan negara anggota OIC untuk mempertingkatkan pengaruh dan mempergiatkan aktiviti dan program termasuk kewangan dan perbankan Islam.

Kerjasama antara negara membangun juga akan dipergiat di dalam RMK-8 dimana kerjasama Selatan-Selatan dikenalpasti sebagai mekanisme yang berkesan bagi mengoptimumkan potensi negara membangun.

"Jurang teknologi antara negara Utara dan Selatan memerlukan negara Selatan bersatu dalam menyuarakan pendapat supaya sistem ekonomi antarabangsa disusun semula," kata laporan itu.--BERNAMA

MOT ZK